

摘藻堂四庫全書薈要

經部

欽定四庫全書薈要

經部

禮記集說卷一百五十二



詳校官編修臣程嘉謨

欽定四庫全書薈要卷二千二百八十

經部

禮記集說卷一百五十二

宋

衛湜

撰

所謂齊其家在脩其身者人之其所親愛而辟焉之其所畏敬而辟焉之其所哀矜而辟焉之其所教情而辟焉故好而知其惡惡而知其美者天下鮮矣故諺有之曰人莫知其子之惡莫知其苗之碩此謂身不脩不可以齊其家

鄭氏曰之適也辟猶喻也言適彼而以心度之曰吾

何以親愛此人非以其有德美與吾何以教情此人非以其志行薄與反以喻已則身脩與否可自知也鮮罕也人莫知其子之惡猶愛而不察碩大也

孔氏曰此覆明前經齊家修身之事農家種田常欲其盛苗雖碩大猶嫌其惡若能以已子而方人子以已苗而匹他苗則好惡可知矣

橫渠張氏曰學者能自察其不善進莫量焉若有未明則觀於他大學所謂之而辟焉是也見人之善則



師之其不善則改而不為乃內外相養之道也

藍田呂氏曰所謂親愛德厚者也所謂賤惡德薄者也畏敬賢於己者也哀矜無所知能者也教情不率教者也見賢思齊則之其所親愛畏敬而辟焉見不賢而內自省則之其所賤惡哀矜教情而辟焉衆人之情察於人而蔽於己如以人之賢不肖反求諸己則己可得而察也好而不知其惡惡而不知其美情亂之也子溺於私愛故不能察其有惡苗求其實利

故唯恐其不碩皆非好惡之正也家人之象君子以言有物而行有常之其所愛敬而修其言行則人亦將愛敬之之其所賤惡而去其不善則人不可得而賤惡之如此則人將矜式之況其家乎故曰其身不修不可以齊其家也

山陰陸氏曰不言此謂齊其家在修其身以其所齊漸廣故其詞嚴下云所謂治國必先齊其家亦以此延平周氏曰傳曰能近取辟可謂仁之方也已果能

近之其身之所親愛者以譬於人之所親愛近之其身之所賤惡者以譬於人之所賤惡與夫之其所畏敬哀矜教情者皆然則其所行者莫非公恕之道故好之者知其有惡之為可惡惡之者知其有美之為可好然好而知其惡惡而知其美者天下常鮮蓋不能參之以彼已而盡其公恕之道而已矣故蔽於愛子之善所以莫知其惡蔽於欲苗之長所以莫知其碩是齊其家者貴乎能參以彼已勿蔽乎吾身之愛

與惡也

石林葉氏曰所藏乎身不恕未有能喻諸人者也故齊家在乎用恕孔子言仁之方則所謂恕也蓋好己之好而不知人之所惡惡己之惡而不知人之所好此其失在於不恕不能近譬者也孟子曰所欲與之聚之所惡勿施爾也好惡同於人則己之所親愛必思以及人之所親愛己之所教情必思以及人之所教情是之謂恕也雖然子者人所愛蔽於子而不知

其惡苗者人所殖蔽於苗而不知其大此天下常多也以其恕已而譬諸人則無蔽雖齊家之道亦若此而已矣

廬陵胡氏曰譬猶省察也人適其所親愛所賤惡而省察焉則知親愛者善而賤惡者之不善也適所畏敬所哀矜所教情而省察焉則知所畏敬者善而所哀矜教情者之不善也見善如不及見不善如探湯而吾身之善不善與他人之善不善昭然可覩矣易

曰觀我生觀民也觀民以察己之道此亦觀人以省己也雖然於所親愛畏敬雖好也而不知其惡於所賤惡哀矜教情雖惡也而不知其善者情汨之也是以狃於私愛莫知其子之惡莫知其苗之碩也

范陽張氏曰修身之道自省而已矣善者吾師也不善者亦吾師也豈非修身之道哉夫人之所親愛者仁人也所賤惡者不仁者也所畏敬者有德者也所哀矜者無辜者也所教情者愚不肖者也方其親愛

仁者畏敬有德者哀矜無辜者也則反而自省曰吾有仁乎有德乎其所以罹憂患者果無辜乎果有仁矣有德矣無辜矣則吾為人所親愛所畏敬所哀矜無疑也方其賤惡不仁者敖惰愚不肖者則又反而自省曰吾不仁如若人乎愚不肖如若人乎果不仁似之愚不肖似之則吾為人所賤惡所敖惰亦無疑也譬也者省也如此則凡目之所見心之所思若親愛者賤惡者畏敬者哀矜者敖惰者皆足以為吾儆

戒豈非善不善皆吾師乎是吾日用中凡所好惡皆取之為自省之資念茲在茲釋茲在茲身之不修無是理也夫人之常情明於責人而闇於責己儻吾見善而好之則反而自照曰彼能是吾乃不能焉是吾之惡德也吾當日夜去其惡而從其善此好而知己之惡者也見惡而惡之則又反而自照曰彼為是而我乃不為焉是吾之美德也吾當日夜保守此善而勿失焉此惡而知己之美者也有行此道者天下鮮



矣喻好而不知其惡者多此所以好他人之子賢而不自知其子之惡也唯惡而不知其美者多此所以惡他人之苗槁而不自知其苗之碩也明於責人故好他人之子賢惡他人之苗槁闇於責己故私愛蔽之至不知其子之惡貪心乘之至不知其苗之碩如此則豈特一身不自知其善惡一家善惡亦且不知而顛倒失序矣身不修不可以齊其家此理之自然也

永嘉薛氏曰有一言而可以終身行之者其恕乎已  
所不欲勿施於人君子之道無他善推其所為而已  
譬所親愛譬所畏敬譬所哀矜譬所教愐取譬反覆  
視我心之輕重則失其正者見矣好而不知其惡惡  
而不知其善皆有所偏也心有所偏則吾之是非錯  
繆失倫輕重無準失其所以成已近而無以齊家猶  
愛而不知其子貪而不知其苗也無偏無黨王道蕩  
蕩則會歸有極矣是故修身以正心為本心正而天

下平矣

新安朱氏曰此傳之八章釋修身齊家辟猶偏也五  
者在人本有當然之則今接其事而不審其則則蹈  
於心所向之偏而身不修矣諺俗語也溺愛者不明  
貪得者無厭是則偏之為害而家之所以不齊也  
或問辟舊讀為譬而今為僻何也曰舊音舊說以上  
章例之而不合也以下文逆之而不通也是以間者  
竊以類例文意求之而得其說如此蓋曰人之於此

五者情有所偏則失其好惡之公而身不修故不能  
齊其家耳然是五者乃身之接物所不能無而亦固  
有當然之理矣苟於是焉徒與之接而不能隨事省  
察以審其所當然之理則未有不因其所重而陷於  
所偏者也故偏於愛則溺焉而不知其惡矣偏於惡  
則阻焉而不知其善矣是其身之不修而目前之是  
非黑白且不能辨而況於閨門之內恩常掩義亦何  
以勝其情愛暱比之私而能有以齊之哉然原其所

以不能察夫當然之理則又本於心不正而上章既言之矣

龍泉葉氏曰所同所與者必親愛之所異所非者必賤惡之賢能者必敬畏之陷溺者必哀矜之是心之出因物而遷然未嘗反之以自喻也使其能反已以自喻則因人之是非賢否而可以自修其身好惡自公取舍自正又安有專好獨惡而失於偏勝者哉子不知其惡苗不知其碩狗已太重而失其中是故善

修身者無他道焉好惡取舍日交於吾前而莫若反之以自喻而已矣此言修身至處其事愈明白可驗只就人情物理見之今所日用常行者便是不必精微妙窮益深測益遠也

四明李氏曰大抵事之能累其心者莫甚於好惡人之欲正於其心者亦莫若公其好惡然古今天下喜者多溢其美怒者多益其惡譽人者必過其實毀人者必失其真故見人之有善則親愛之畏敬之本不

為失也自因其所親愛所畏敬而過有所好焉則是其所是而非天下之公是矣見人之不善則賤惡之哀矜教愐之亦本不為失也自因其所賤惡所哀矜所教愐而過有所惡焉則非其所非而非天下之公非矣是非之在天下初無兩立之理一離於公則必入於僻故大學一書丁寧於好惡者尤詳前論正心既曰心有所好樂則不得其正此論修身復曰好而知其惡惡而知其美及論治國則曰民之所好好之

民之所惡惡之又曰惟仁者能好人能惡人而又戒之曰好人之所惡惡人之所好反覆諄諄不一而足學者能平心以察之反己以思之接於耳目者無非進德之基無非內省之要殆見虛明洞達正平坦夷無有作好無有作惡推此以平天下可也豈特齊家而已哉

新定錢氏曰論齊家在修其身却只說身之所以不修處若說身之所以修即是上章正心事矣立辭嚴



密極宜細玩且於齊家利害愈更深切上章只說心之所以不正處文意亦如此上章四箇有所字此章六箇辟字其實皆心之病但上四者止是自身裏事此六者却施於人即處家之道也所以不同

所謂治國必先齊其家者其家不可教而能教人者無之故君子不出家而成教於國孝者所以事君也弟者所以事長也慈者所以使衆也康誥曰如保赤子心誠求之雖不中不遠矣未有學養子而后嫁者也一家仁

一國興仁一家讓一國興讓一人貪戾一國作亂其機如此此謂一言僨事一人定國堯舜帥天下以仁而民從之桀紂帥天下以暴而民從之其所令反其所好而民不從是故君子有諸已而后求諸人無諸已而后非諸人所藏乎身不恕而能喻諸人者未之有也故治國在齊其家詩云桃之夭夭其葉蓁蓁之子于歸宜其家人宜其家人而后可以教國人詩云宜兄宜弟宜兄宜弟而后可以教國人詩云其儀不忒正是四國其為父

子兄弟足法而后民法之也此謂治國在齊其家

鄭氏曰一家一人謂人君也戾之言利也機發動所  
由也僨猶覆敗也民從之言民化君行也君若好貨  
而禁民淫於財利不能止也有於已謂有仁讓也無  
於已謂無貪戾也

孔氏曰此一節覆明前經治國齊家之事成王戒康  
叔治民如保赤子愛之甚也心誠求之雖不中不遠  
言愛赤子者內心精誠求赤子之嗜欲雖不能正中

其所欲然亦不甚遠治人之道亦當如此未有學養子而后嫁者言母之養子自然而愛中其嗜欲非由學習而能皆其本心如此一言僨事謂人君一言覆敗其事謂惡言也一人能定其國謂善政也古有此言記者引以結上事令謂號令所好者是惡所令者是善則是反其所好雖欲禁人人不從也非諸人非謂非責也所藏乎身不恕言無善行於身欲喻人為善行不可得也引周南桃夭之篇夭夭少壯蓁蓁茂盛

盛喻婦人也之子是子也歸嫁也宜其家人宜其夫  
家之人也又引小雅蓼蕭之篇言成王有德兄弟相  
善相宜也引曹風鴈鴒之篇忒差也言威儀不差則  
可以正四方之國

河南程氏曰今夫赤子未能言其志意嗜欲人所未  
知其母必不能知之然不至誤認其意者何也誠心  
愛敬而已若使愛敬其民如其赤子何錯繆之有故  
心誠求之雖不中不遠矣又曰母之保養赤子始

何嘗學當保養時自然中所欲推此心以保民設不  
中其下之所欲亦不遠矣

藍田呂氏曰孟子曰為政不難不得罪於巨室巨室  
之所慕一國慕之巨室大家也仰而有父母俯而有  
妻子有兄有弟有臣有妾尊卑䟽戚一國之事具矣  
嚴而不厲寬而有閑此家之所以正也大家難齊也  
不得罪於大家則於治國也何有齊桓公五霸之盛  
由不能正其家死未及殮而國已亂矣故虞舜之世

天下之為父子者定以瞽叟底豫而已文王之時天下無犯非禮以刑于寡妻而已舉治家之心以加之於國雖有大小之間宜不遠矣故未有學養子而後嫁者也所謂一家一人者皆謂君也君者國之機也君仁莫不仁君義莫不義一正君而國定矣其機如此故國之本在家家之本在身可不慎歟民可使心服而不可使力服可以身帥而不可以令帥堯舜之仁桀紂之暴所以皆從其所好而不從其所令也有

諸已而后求諸人無諸已而后非諸人此所以身帥而使人心服者也其道也自一人一家始故所以先之也宜其家人宜兄宜弟其父子兄弟之道不待諄諄教告家至而日見之也至誠足以孚其心儀刑足以親其外國之不治未之有也

延平周氏曰一家仁一國興仁一人貪戾一國作亂治亂之機常發於一人而卒至於天下也如此

嚴陵方氏曰事君以忠本乎事父之孝事長以順本



乎事兄之弟使衆以仁本乎愛子之慈孝經曰君子之事親孝故忠可移於君事兄弟故順可移於長居家理故治可移於官正與此合所謂不出家而成教於國也赤子言新生體赤也母之養子以心度心皆其自然不必學也以言慈之所以使衆亦舉斯心加諸彼而已於仁讓皆曰一家於貪戾止曰一人者蓋貪戾之致亂其效尤易見也一言僨事則語所謂一言可以喪邦是也一人定國則詩所謂一國之事繫

一人之本是也戾違於道也率者身為之先也有諸已而后求諸人無諸已而后非諸人皆內恕及人之道止言父子兄弟足法者本孝弟言之也

石林葉氏曰上有好者下必有甚焉堯舜桀紂之率民者豈諄諄然命之哉以所好示之而已矣有諸已則人易從無諸已而后非諸人則人不怨先閨門則宜其家人次親族則宜其兄弟後國人則民以為法故孟子曰天下之本在國國之本在家家之本在身

莆陽林氏曰治天下要領不出閨門衽席之上天下  
國家皆有父兄子弟唯在我者先正則推此而行亦  
皆如是文王之治岐也刑于寡妻至於兄弟以御于  
家邦故三百篇之詩遂以關雎為首非獨文王為然  
自堯舜禹湯以來皆用此道以治天下故在家莫親  
於父子兄弟家不正何以教人是以君子不出一家  
之中推此可以成教於國

廬陵胡氏曰家人之彖先內後外以內為本內正而

後家可齊也齊有威嚴之義凡物以猛為本者則患  
在寡恩以愛為本者則患在寡威家人主愛故尚威  
嚴其豕曰有嚴君焉其父曰嗃嗃悔厲吉又曰威如  
終吉如此而後威克厥愛而家可齊矣如保赤子心  
誠求之謂當以誠存心也故家人又貴乎有孚未有  
威信不行乎家而國人化之者也養子者推心為之  
而得赤子之嗜欲蓋赤子之心唯誠而已心誠求之  
則不失赤子之心矣機謂發於近中於遠君者國之

機其善惡亦發於身而加乎民也堯舜躬行仁而比  
屋可封從其仁也桀紂躬行暴而比屋可誅從其暴  
也率謂躬行也若已不行仁而禁民為暴是謂所令  
反所好有諸已已有善也無諸已已無惡也觀人善  
惡當於其私父子兄弟私也故父子兄弟足法而後  
民法之也家人初九閑有家志未變也凡教在初而  
法在始家瀆而後嚴之志變而後閑之則無及矣故  
齊家必曰先謂閑於未變

東萊呂氏曰有善於已然後可以責人之善無惡於已然後可以非人之惡恕謂推已及人也不能推已及人而但欲以言語曉喻人不可得也聞諸先生曰有諸已不必求諸人以求諸人而無諸已則不可也無諸已不必非諸人以非諸人而有諸已則不可也

居仁

范陽張氏曰事君之忠即在家之孝也事長之順即在家之弟也使衆之仁即在家之慈也豈有二道哉

推孝事君推弟事長推慈使衆雖或時有齟齬不合  
參差不齊然其要處不過如是而已故大學引康誥  
如保赤子為證涵泳於斯而歌桃夭之詩以證此理  
又歌蓼蕭之詩以證此理又歌鴈鴒之詩以證此理  
想見大學之道雍容善端有如此之樂也

新安朱氏曰此傳之九章釋齊家治國孝弟慈者家  
之所以齊者也能修之身以致其教則一家之人皆  
孝弟慈而國之所以事君事長使衆之道不外是矣

引書而釋之以言慈幼之心非由外鑠推以使衆亦猶是耳有善於已然後可以責人之善無惡於已然後可以正人之惡皆推已以及人所謂恕也不如是則所令反其所好而民不從矣喻曉也此三引詩皆以咏歎上文之事而又結之以治國在齊其家其味深長最宜潛玩 或問如保赤子何也曰程子有言赤子未能自言其意而為之母者慈愛之心出於至誠則凡所以求其意者雖或不中而不至於大相遠



矣豈待學而後能哉民能自言其意而使之者反不能無失於其心則以本無慈愛之實而於此有不察耳傳之引此蓋以明夫能教其家使無不慈則國人之化之亦無不慈者而所以教之之本則在心誠求之一言耳初豈有他道哉 曰仁讓言家貧戾言人何也曰善必積而后成惡雖小而可懼古人之深戒也書所謂爾惟德罔小萬邦惟慶爾惟不德罔大墜厥宗亦是意爾 曰此章本言上行下效有不期然而

然者今日有諸已而后求諸人無諸已而后非諸人則是適修於內而遽欲以求乎外以已之僅免而遂欲責人之必無也曰此為治其國者言之則推吾所有與民共由其條教法令之施賞善罰惡之政固有理所當然而不可已者但以其所令反其所好則民不從故又推本言之而欲其先有以成已非欲矜已之長愧人之短而脅之以必從也故先君子之言曰有諸已不必求諸人以為求諸人而無諸已則不可

也無諸已不必非諸人以為非諸人而有諸已則不可也正此意也曰然則未能有善而遂不求人之善未能去惡而遂不非人之惡斯不亦恕而終身可行乎哉曰恕字之指以如心為義蓋曰如治已之心以治人愛已之心以愛人而非苟然姑息之謂也然人之為心必當窮理以正之使其所以治已愛已者皆出於正然後可以即是推之以及於人而恕之為道有可言者故大學之傳最後兩章始及於此則其用

力之序亦可見矣至即此章而論之則欲如治己之心以治人者又不過以強於自治為本蓋能強於自治至於有善然後可以求人之善無惡然後可以非人之惡然後推以及人使之亦如我之所以自治而自治焉則表端影正源潔流清而治已治人無不盡其道矣所以終身力此而無不可行之時也今乃不然而直欲以不肖之身為標準視吾治教之所當及者以姑息待之不相訓誥不相禁戒使天下之人皆

如已之不肖而淪胥以陷焉是乃大亂之道豈所謂  
終身可行之恕哉近世名卿之言有曰人雖至愚責  
人則明雖有聰明恕已則昏苟能以責人之心責已  
恕已之心恕人則不患不至於聖賢矣此言近厚世  
亦多稱之者但恕字之義本以如心而得故可以施  
之於人而不可施之於已今曰恕已則昏則是已知  
其如此矣而又曰以恕已之心恕人則未知所謂恕  
已之心何耶其或未得此心之正則恐其猶未免於

昏也若之何其可以推已及人哉藉令其意但欲反此心以施於人其亦只可以言下章愛人之事而於此章治人之意與夫中庸以人治人之說則皆有未合者蓋其為恕雖同而一以治人為主一以自治為主則二者之間毫釐之差正學者所當深察而明辨也至漢光武謂郅惲善恕已量主此又啟為人臣者以賊其君之罪一字之義不明其禍乃至於此可不謹哉 曰三詩之序首言家人次言兄弟終言四國

亦刑于寡妻至于兄弟以御于家邦之意也 曰既

結上文而復引詩者三何也曰古人言必引詩蓋取其嗟歎咏歌優游厭飫有以感發人之善心非徒取彼之文證此之義而已矣夫以此章所論齊家治國之事文具而意足矣復三引詩非能於其所論之外別有所發明也然嘗試讀之則反復吟咏之間意味深長義理通暢使人心融神會有不知手舞而足蹈者是則引詩之助與為多焉蓋不獨此也凡引詩云

者皆以是而求之則引者之意可見而詩之為用亦得矣

永嘉薛氏曰內外之合所謂恕也已所不欲勿施於人一言而可以終身行之者篤恭而天下平用此道也孔子曰其身正不令而行其身不正雖令不從

龍泉葉氏曰君子不出家而成教於國不知足而為屨我知其不為蕢也患不為屨耳豈有為蕢者哉古人有慈孝之實推而行之則事其父者所以為事君



事其兄者所以為事長使天下容受羣衆皆由此見之若徒即其名而不盡其實則雖行於一家而格於其人者乃其勢也不自知其不至而尤孝慈之空言與徒即其名而望天下之自化二者皆失之矣又曰心誠求之雖不中不遠矣未有學養子而後嫁者也此言至切施於當事者對病之神藥照形之明鏡也自下以首尾次第論如必待齊家治國而後用之則有所繫縛效反不得專矣所謂大學者以其學而

大成異於小學處可以修身齊家出可以治國平天下也然其書開截箋解彼此不相顧而貫穿通徹之義終以不明學者又逐逐焉章句分析隨文為說名為習大學而實未離於小學此其可惜也哉

江陵項氏曰有諸已而後求諸人無諸已而後非諸人此為治人者言之也左氏傳所謂無瑕者可以戮人也子欲善而民善矣有諸已而後求諸人也荀子之不欲雖賞之不竊無諸已而後非諸人也此所謂

治國在齊其家也若謂治已則有諸已而求諸人是  
以其所能者病人也無諸已而非諸人是以人之所  
不能者愧人也非制行之法也故嘗謂此章當與表  
記仁之難成章並觀

雪川倪氏曰嫁而有子必知養之方不待預學而  
後能此譬養民之道不待臨政而後學也宜兄者兄  
友其弟宜為人兄而弟亦宜之宜弟者弟敬其兄宜  
為人弟而兄亦宜之以其兄弟友睦而更相教故能

推一國之人為兄弟者皆化之無不相宜者

新定錢氏曰君子之德風小人之德草草上之風必偃不幸為人上者為貪刻為暴戾則從風而靡必有甚焉者矣仁讓說一家貪戾却只說一人仁讓之化止於仁讓貪戾之禍遂至作亂可不謹歟可不懼歟所藏乎身不怨而欲以空言呶呶於人不可得矣恕字是一章之綱領已行得人亦行得國亦行得此所以成教所以興所以從若只是自家偏私之說如何

能喻

新定邵氏曰於文如心為恕己所不欲勿施於人者  
恕也已所不欲而施於人是謂不如其心非恕也所  
藏乎身不恕而能喻諸人者未之有也喻猶曉也聞  
有仁義根心畔面盎背瞻其容貌不言而喻者矣未  
聞矯飾為欺色取仁而行違者能使夫人心孚而意  
喻者也

所謂平天下在治其國者上老老而民興孝上長長而

民興弟上恤孤而民不倍是以君子有絜矩之道也所惡於上毋以使下所惡於下毋以事上所惡於前毋以先後所惡於後毋以從前所惡於右毋以交於左所惡於左毋以交於右此之謂絜矩之道詩云樂只君子民之父母民之所好好之民之所惡惡之此之謂民之父母詩云節彼南山維石巖巖赫赫師尹民具爾瞻有國者不可以不慎辟則為天下僇矣詩云殷之未喪師克配上帝儀監于殷峻命不易道得衆則得國失衆則失

國

鄭氏曰老老長長謂尊老敬長也恤憂也民不倍不相倍弃也絜猶結也挈也矩法也君子有挈法之道謂常執而行之動作不失之倍或作偕矩或作巨絜矩之道善持其所有以恕於人耳治國之要盡於此引詩言治民之道取於已而已巖巖喻師尹之高嚴也師尹天子之大臣為政者也言民皆視其所行而則之可不慎其德乎邪辟失道則有大刑師衆也克

能也峻大也言殷王帝乙以上未失其民之時德亦  
有能配天者謂天饗其祭祀也及紂為惡而民怨神  
怒以失天下監視殷時之事天之大命持之誠不易  
也道猶言也

孔氏曰自此至終篇覆明上文平天下在治其國之  
事蓋治國非一義可了故廣而明之此經申明絜矩  
之義上有不善之事加己己惡之則不可持此事使  
己下者為之下不善事己己惡之則不可以此事已



之君上也前謂在已之前後謂在已之後左右謂與已平敵或在已右或在已左舉一隅餘可知也引小雅南山有臺美成王之詩言以已化民從民所欲則可為民父母只語辭也上言恕已待民此經言已湏戒慎引詩小雅節南山之篇節高峻貌赫赫顯盛貌具俱也僂謂刑戮若桀紂是也殷之未喪師以下大雅文王之篇儀宜也

藍田呂氏曰孟子曰道在邇而求諸遠事在易而求

諸難人人親其親長其長而天下平蓋所謂平者合  
內外通彼我而已天下同歸而殊塗一致而百慮天  
下雖廣出於一理舉斯心以加諸彼推而放諸四海  
而準無往而非斯心也猶五寸之矩足以盡天下之  
方此絜矩之道也上下也左右也前後也彼我之別  
也通乎彼我交見而無蔽則民也君也將何間哉此  
所以為民父母而天下瞻仰之矣故所以得國以得  
衆也所以得衆以有德也

范氏曰漢書云度長絜大注曰絜圍束之也莊子絜之百圍亦謂圍而度之也矩所以為方絜矩言度之以求其方也既度其上又度其下既度其下又度其上於前於後於左於右莫不皆然不使少有大小長短之差焉是以物我各適其適無往而不得其方也天下者國之積耳以此推之則自一國以至於萬國一理而已

范陽張氏曰修身齊家治國平天下雖所由不同其

理則一而已其一如何審好惡而已矣故修身之法  
無他省吾所親愛賤惡畏敬哀矜教惰而已豈非當  
審吾好惡乎齊家之道無他一家仁一國興仁一人  
貪戾一國作亂而已豈非當審吾好惡乎治國之道  
無他民之所好好之民之所惡惡之豈非當審吾好  
惡乎而平天下之道亦在於好惡之審則老老而民  
起孝長長而民起弟恤孤而民皆為忠厚之行所惡  
之審則母以吾所惡於上者施之於下母以吾所惡

於下者施之於上毋以吾所惡於後者施之於前毋  
以吾所惡於右者施之於左是則平天下之理果在  
審好惡而已矣 又曰文王之詩言商未失衆時克  
配上帝至紂失天下其膚敏之士反為周祿將之役  
天命如此可不以為戒乎且斷之曰得衆則得國失  
衆則失國何以得衆曰德此君子所以先慎乎德也  
石林葉氏曰老者近於親故民興於孝長者近於兄  
故民興於弟恤孤近於子故民不倍以此倡於上絜

之道也以此法於下矩之道也上下以位言之也前後以事言之也左右以人言之也位之與事事之與人雖不同而其好惡則一也故好同其所好惡同其所惡而後可以為民父母

莆陽林氏曰一人在上使天下人心固結而不可解者必有正道焉蓋四方萬里之遠若非有以固結之則如何長有天下故詩以為民之父母者無他唯與天下同其好惡而已若是好惡與天下不相關此之

謂獨夫爾

新安朱氏曰自此至篇末傳之十章釋治國平天下皆推廣絜矩之意也老老所謂老吾老也興謂有所感發而興起也孤者幼而無父之稱絜度也矩所以為方也言此三者上行下效捷於影響所謂家齊而國治也亦可以見人心之所同而不可使有一夫之不獲矣是以君子必當因其所同推以度物使彼我之間各得分願則上下四旁均齊方正而天下平矣

又覆解上文絜矩二字之義如不欲上之無禮於我則必以此度下之心而亦不以此使之不欲下之不忠於我則必以此度上之心而亦不以此事之至於前後左右莫不皆然則身之所處上下四旁長短廣狹彼此如一而無不方矣彼同有是心而興起焉者又豈有一夫之不獲哉所操者約而所及者廣此平天下之要道也故章內之意皆自此而推之南山有臺之篇言能絜矩而以民心為己心則是愛民如子



而民愛之如父母矣節彼南山節讀為截節然高大貌師尹周之太師尹氏也具俱也辟偏也言在上者人所瞻仰不可不謹若不能絜矩而好惡徇於一己之偏則身弑國亡為天下之大戮矣引詩文王篇配對也配上帝言其為天下君而對乎上帝也監視也不易言難保也引詩而言此以結上文兩節之意有天下者能存此心而不失則所以絜矩而與民同欲者自不能已矣或問上章論齊家治國之道既以

孝弟慈為言矣此論治國平天下之道而復以是為  
言何也曰三者人道之大端衆心之所同得者也自  
家以及國自國以及天下雖有大小之殊然其道不  
過如此而已但前章專以己推而人化為言此章又  
申言之以見人心之所同而不能己者如此是以君  
子不唯有以化之而又有以處之也蓋人之所以為  
心者雖曰未嘗不同然貴賤殊勢賢愚異稟苟非在  
上之君子真知實蹈有以開之則下之有是心者亦

無所感而興起矣雖幸其有以倡焉而興起之矣然  
上之君子乃不能察彼之心而失其所以處之之道  
則其所興起者或不得遂而反有不均之歎是以君  
子於其心之所同而得夫絜矩之道焉所以處此而  
遂其興起之善端也曰何以言絜之為度也曰此莊  
子所謂絜之百圍賈子所謂度長絜大者也前此諸  
儒蓋莫之省強訓以絜殊無意謂而先友太史范公  
乃獨嘗言此而後其理可得而通蓋絜度也矩所以

為方也以已之心度人之心知人之所惡者不異乎  
已則不敢以已之所惡者施之於人使吾之身一處  
乎此則上下四方物我之際各得其分不相侵越而  
就其中較其所占之地則廣狹長短平均如一截然  
正方無有餘不足之處是則所謂絜矩者也夫為天  
下國家而所以處心制事者一出於此則天地之間  
無一物不得其所而凡天下之欲為孝弟不倍者皆  
得以自盡其心而無不均之歎矣天下其有不平者

乎然君子之所以有此亦豈自外至而強為之哉亦  
曰物格知至故有以通天下之志而知千萬人之心  
即一人之心意誠心正故有以勝一己之私而能以  
一人之心為千萬人之心其如此而已矣一有私意  
存乎其間則一膜之外便為胡越雖欲絜矩亦將有  
所隔礙而不能通矣若趙由為守則易尉而為尉則  
陵守王肅方於事上而好人佞已推其所由蓋出於  
此而充其類則雖桀紂盜跖之所為亦將何所不至

哉曰然則絜矩之云是則所謂恕者已乎曰此固前輩所謂如愛己之心以愛人者也夫子所謂終身可行程子所謂擴克得去則天地變化草木蕃克拓不去則天地閉而賢人隱皆以其可以推之而無不通爾然必自其正心窮理而推之則吾之愛惡取舍皆得其正而所推以及人者亦無不得其正是以上下四方以矩度之莫不截然各得其分若於理有未明而心有未正則吾之所欲者未必其所當欲吾之所

惡者未必其所當惡乃不察此而遽欲以是為施於人之準則則其意雖公而事則私是將見其物我相侵彼此交病即雖庭除之內跬步之間亦且參商矛盾而不可行矣尚何終身之望是以聖賢凡言恕者又必以忠為本而程子亦言如形與影欲去其一而不可得蓋唯忠然後所如之心始得其正是亦此篇先後本末之意也然則君子之學可不謹其序與或曰齊家治國平天下均為治人之事而傳於齊家以

審愛惡為言於治國以躬化導為說於平天下則必  
以絜矩明之豈三者之用各有所施而不可以相通  
耶曰此亦各隨所重而言之其用益廣而法益詳耳  
若論其實則齊家者豈無待於躬化導而參彼已治  
國者亦安可不審愛惡而參彼已況平天下必自齊  
家治國而來則二者之用固有不得遺者但以其先  
後廣狹而言則三者之序必如此而不可亂耳曰  
所謂民之父母者何也曰君子有絜矩之道故能以



己之好惡知民之好惡又能以民之好惡為己之好惡也夫好其所好而與之聚之惡其所惡而不以施焉則上之愛下真猶父母之愛其子矣彼民之親其上豈不亦猶子之愛其父母哉 曰此所引節南山之詩何也曰言在尊位者人所觀仰不可不謹若人君恣己徇私不與天下同其好惡則為天下僂如桀紂幽厲也 曰得衆得國失衆失國何也曰言能絜矩則民父母之而得衆得國矣不能絜矩則為天下

僂而失衆失國矣

龍泉葉氏曰絜是矩者非難也天下之方至於矩而止天下之圓至於規而止天下之長短至尺度而止天下之曲直至繩墨而止天下之輕重至權量而止是物之在我也絜以示之而何患焉雖然其所以為矩則難矣使其毫釐之不盡斯湏之或虧自內至外由本及末而或有不足焉則矩不成則雖欲絜之以示人不可得矣聖賢之學自其內心之發推之於外

修身齊家搏節端序各有倫等而不可亂者皆為矩之地也堯舜禹湯文武絜成矩以示天下而天下從之故凡天下之有未安者必求於我而我不以其所未至者病天下也孟子曰舜為法於天下可傳於後世則舜之矩也大矣究極絜矩之道不過於恕而已上下左右前後物未有不具四隅而能獨立者也然而天下之人所藏於身者不恕則見於前者必忘其後得於上者必失於下以其所惡者盡力施之而不

知彼之不能受也夫是以患莫大於自利而害常生  
於有所偏君子盡已而及人因人而通已交取互見  
仰觀俯察在我欲其無憾在彼欲其無怨知天下之  
一理彼我之一心則規矩在我而物之方圓者莫能  
踰權量自我而其自為輕重者無所惑自致知格物  
以至於平天下其必有出於是道不出於是則意有  
誠而非其意心有正而非其心施於天下國家者且  
有不合矣

建安真氏曰絜矩絜字本出賈誼過秦論度長絜大  
度謂以尺量物之長短絜謂以帶量物之小大如今  
人之圍木也言我有此心人亦有此心在上之君子  
當以已之心度人之心如以矩而度物也矩製方之  
器俗謂曲尺是也荀子曰五寸之矩盡天下之方言  
矩雖止長五寸然天下之為方器者必以此焉則以  
譬一心雖微而推之以度人之心雖千萬人無不同  
者我欲孝於親人亦欲孝於親我欲弟於長人亦欲

弟於長故為君子者必使人各得以遂其孝弟之心  
我欲安人亦欲安我欲壽人亦欲壽我欲富人亦欲  
富故君子者必使人各遂其所欲此皆所謂絜矩也  
錢塘于氏曰君子以此三者為絜矩之道以明明德  
於天下者苟不由是三者之善以為矩則民情未易  
平也平之道如何使上下前後左右皆不以其所  
惡自累則是皆以其所好者相與無一人不孝不弟  
不慈矣其為矩也莫明焉故曰此之謂絜矩之道蓋

言天下無一人不明於矩也易言萬物之絜齊記言  
主人之潔著此水亦其義也嗚呼天下之所真可好  
者孰非孝弟慈之三者而其所真可惡者孰非不孝  
不弟不慈之三者今因民之所好而好之因民之所  
惡而惡之則上之好惡平上之好惡平則人心平人  
心平則天下平矣

雪川倪氏曰前言絜矩之道謂正己格民後言絜矩  
之道謂體物正己

新定邵氏曰矩所以為方也上下四旁長短廣狹均  
齊若一而後成方所謂絜矩者猶言斟量忖度舉斯  
加彼使之均平也所惡於上毋以使下所惡於下毋  
以事上味斯言也則君使臣以禮臣事君以忠其或  
上之使我不以禮吾之所惡也則吾之所以使下者  
烏可不以禮下之事我不以忠吾之所惡也則吾之  
所以事上者烏可不以忠審度彼我事皆若此則上  
下各得其所欲矣所惡於前毋以先後所惡於後毋



以從前充此類也則戶外有二屨言聞則入言不聞則不入者慮其有妨於前也有後入者闔而勿遂慮其有妨於後也審度彼我事皆若此則前後各得其所願矣以至右之所惡者則不以交於左左之所惡者則不以交於右姑即夫並坐不橫肱之義而推之則其理亦可見矣夫上下前後左右皆得其平則截然正方合於矩矣大學於是釋之曰此之謂絜矩之道斯道也豈非平治天下者所當舉而措之乎吾嘗

求諸古矣老吾老以及人之老固可以興民心之孝也然考之王制必五十而異糧六十而宿肉七十而貳膳以至八十而後常珍九十而後飲食不離寢何其斟酌劑量曾不一概也不如是則可以暫而不可以久區處未適其平非所謂絜矩之道也長吾長以及人之長固可以興民心之弟也然質之祭義如是而弟達乎朝廷如是而弟達乎道路如是而弟達乎州巷以至放乎搜狩修乎軍旅莫不隆長而尚齒何

其流通周溥靡有或遺也不如是則達於此而不達  
於彼區處未適其平非所謂絜矩之道也矜寡孤獨  
廢疾者皆有所養固可以使民相收相受不相棄倍  
也然古人抑豈概而施之不思為可繼之道哉孤獨  
矜寡四者天民之窮而無告者也皆有常餼以養之矣  
至於瘠癯跛躄斷者侏儒則百工各隨其器能而食  
之使廢疾者不患於無所收而百工亦不虛於推所  
養也古人絜矩之道一至於此則經理區畫曲盡其

宜天下其有不得其平者乎

禮記集說卷一百五十二

謹案第三頁前八行勿蔽乎吾身之愛與惡也刊  
本勿訛而今改

第三頁後七行必思以及人之所親愛刊本及訛  
反今改

第六頁前四行故私愛蔽之刊本愛蔽訛蔽愛今  
改


第八頁後七行怒者多蓋其惡蓋字疑誤

第二十頁後五行毫釐之差刊本差訛意今改

第三十九頁前四行然古人抑豈概而施之刊本

施訛思今改





覆校官編修臣項家達

校對官檢討臣盧應

謄錄監生臣康偉

欽定四庫全書薈要

經部

禮記集說卷一百五十三

臣紀昀詳校

詳校官編修臣程嘉謨





欽定四庫全書贅要卷二千二百八十一

經部

禮記集說卷一百五十三

宋 衛湜 撰

是故君子先慎乎德有德此有人有人此有土有土此有財有財此有用德者本也財者末也外本內末爭民施奪是故財聚則民散財散則民聚是故言悖而出者亦悖而入貨悖而入者亦悖而出

鄭氏曰用謂國用也施奪施其劫奪之情也悖猶逆也言君有逆命則民有逆辭也上貪於利則下人侵

畔老子曰多藏必厚亡

孔氏曰此明治國之道在貴德賤財有德之人人所附從有人則境土寬大有土則殖萬物有財則有以供國用德能致財財由德有故德為本財為末外疏也內親也親財疏德則爭利之人皆施其劫奪之情也

涑水司馬氏曰君有德則人歸之人歸之則其土地且奚去我而適他言其要在得人心也

延平周氏曰財之與德其猶陰之與陽乎陰能輔陽亦能害陽財本輔德亦能害德德者本也財者末也內本而外末則本重而末輕雖不爭民之施奪而施奪之權自歸于上也外本而內末則本輕而末重雖欲爭民之施奪而施奪之權不免在於民也

嚴陵方氏曰外本內末爭民施奪孟子所謂苟為後義而先利不奪不餒者亦此之意言悖而出亦悖而入者報施之理然也貨悖而入亦悖而出者消長之

理然也

山陰陸氏曰爭民施奪言爭民之所施亦爭民之所奪是與民爭利者也

石林葉氏曰得道則多助故有德此有人得衆則得國故有人此有土非財無以聚人故有土此有財理財不以義則物必屈於欲故有財此有用財也土也人也非德不能有故曰德者本也有德則人歸矣財必生於土故曰財者末也內本而外末則人之所貴

者德故天下各懷仁義以事其上雖不爭民之施奪而財自足也外本而內末則人所貴者財故上下交征以利則雖爭民之施奪而財亦不得而足矣蓋財聚而不能散則民離財雖多亦無以守財聚而能散則民附財雖少亦可以生故君人者修德以得人聚財以養人未有用財以道而民不聚亦未有聚財不以道而終能守也猶之言出於身既悖於道而召禍乎外亦悖而入此必至之理也曾子曰出乎爾反乎

爾其此之謂乎

藍田呂氏曰知以德為之本有人有土有財有用非  
吾患也不知以德為本而本於財上下交征利不奪  
不饜食矣此所謂外本內末爭民施奪者也天下之事  
未有不反者也惡言加於人則人亦將加惡言於已  
以非義之事取其財則必有非義之事費其財蓋不  
知義為利者也

東萊呂氏曰外本謂以本為外內末謂以末為內爭

民施奪謂爭鬪之民施其劫奪之情也言在上之人  
外本內末則是使爭鬪之民施其劫奪之情也言之  
出也不善則人亦以惡言反之悖出而悖入也貨之  
入也不善則亦必以不善失之悖入而悖出也此以  
言之出入明貨之出入

居仁

延平黃氏曰財用自其有德而致之其取也有義非  
悖而入也其用也有禮非悖而出也

范陽張氏曰德者本也財者末也德者義也財者利

也以利為尚則天下相率而為利故起爭民施奪之心施者無所禁制也且義者何也忠信也德也財者何也利也驕泰也爭奪也好義則得民心好利則失民心失民心則天下社稷宗廟不保矣是以大學之道以義用財而不以財勝義蓋財聚則民散以利為主則失民心矣財散則民聚以義為主則得民心矣夫何故言悖而出者必有悖理之言以應之貨悖而入者必有悖理之事以散之故君子生財之道一以



儉約為先也

新安朱氏曰先慎乎德承上文不可不慎而言德即所謂明德有人謂得衆有土謂得國有國則不患無財用矣德者本也財者末也本上文而言人君以德為外以財為內則是爭鬪其民而施之以劫奪之教也蓋財者人之所同欲不能絜矩而欲專之則民亦起而爭奪矣外本內末故財聚爭民施奪故民散反是則有德而有人矣悖逆也自先慎乎德以下至此

又因財貨以明能絜矩與不能者之得失也 曰所謂先慎乎德何也曰上言有國者不可不慎此言其所慎而當先者尤在於德也德即所謂明德所以慎之亦曰格物致知誠意正心以修其身而已矣 曰此其深言務財用而失民何也曰有德而有人有土則因天分地不患乎無財用矣然不知本末而無絜矩之心則未有不爭鬪其民而施之以劫奪之教者也易大傳曰何以聚人曰財春秋外傳曰王人者將

以導利而布之上下者也故財聚於上則民散於下  
矣財散於下則民歸於上矣言悖而出者亦悖而入  
貨悖而入者亦悖而出鄭氏以為君有逆命則民有  
逆辭上貪於利則下人侵畔得其旨矣

龍泉葉氏曰甚矣利之可畏也聚天下不可以無利  
而利聚則民必攜聖人知其然也散天下之財使之  
疏通流演而無壅遏偏聚之患若此則民聚矣以民  
聚為財之本而以財聚為民之病故以道權之以法

御之天下本無可聚之財也其聚之者非義也悖也  
言當順以出貨當順以入出入各得其當而天下治  
小人則不然言以悖出貨以悖入至其報應之來速  
於影響驗於符節拱手視之而莫能救也

雪川倪氏曰人之性善其德本明所以昏之者貪求  
近利謂道德為無所利也孰知德之中自有利存乎  
其間為人上者有德以拊民人懷而歸之有人以治  
其田疇扞其外侮以什一之法取於民通三十年之

積有九年之蓄則有財矣前之本末以明德修身為本其餘為末本末之大者也今論德之與財亦以本末言本末之次者也爭民者爭民之利也上既與民爭下必效之不奪不饜矣施言用之廣也用爭奪之術廣施之而無限節也

新定邵氏曰財聚斂於上則民失所養而離散於下財布散於下則民得所養而聚戴乎上二者正相反也鹿臺鉅橋為世永鑒然三代而下人主富民之念

常輕富國之意常重雖號為英明刻意為善而充府庫實倉廩之念終未盡忘其故何也良由大學不講而所以明其明德者未至耳果能先謹乎德使此心天理湛然常明則民吾同胞癢病疾痛舉切吾身發政施仁唯恐赤子之不得其乳而何忍括民財以聚於其上哉

康誥曰惟命不于常道善則得之不善則失之矣楚書曰楚國無以為寶惟善以為寶舅犯曰亡人無以為寶

仁親以為寶

鄭氏曰于於也天命不于常言不專祐一家也楚書楚昭王時書也言以善人為寶時謂觀射父昭奚恤也舅犯晉文公之舅狐偃也亡人謂文公也時辟驪姬之讒亡在翟而獻公薨秦穆公使子顯弔因勸之復國舅犯為之對此辭也仁親猶言親愛仁道也明不因喪規利也

孔氏曰書之意言善則得之不善則失之

嚴陵方氏曰惟善以為寶者君也仁親以為寶者子也君能寶善則足以為貴於一國子能寶親則足以為貴於一家雖其大小不同所以為寶則一而已

藍田呂氏曰自此至驕泰以失之宜在平天下在治其國一章後平天下者善與人同故取諸人以為善利與人同故好貨好色與百姓同之善不與人同則媚疾之心生故無好善之心利不與人同則貪吝之心生故無好義遠利之誠觀康誥之言則知天命無



常惟善是與也觀楚書曰舅犯之言則天下之寶惟善為寶也

新安朱氏曰道言也因上文引文王詩之意而申言之其丁寧反覆之意益深切矣楚書楚語言不寶金玉而寶善人也狐偃字子犯亡人文公時為公子出亡在外也仁愛也事見檀弓此兩節又明不外本而內末之意曰前既言命之不易矣此又言命之不常何也曰以天命之重而致其丁寧之意亦承上文言

之也蓋善則得之者有德而有人之謂也不善則失之者恃入而恃出之謂也然則命之不常惟人之所自為耳可不謹哉

龍泉葉氏曰得失觀其善惡而已矣世固有得天下之大如舜禹而行道之人乞一簞食豆羹之微或不可而輒喪之者焉學者考其得失之際則善惡自我而物莫能違耳目之常者不可恃而一身之德不敢忽蓋晉楚之富未有可以因循而常守者也山高忽

摧河深忽竭豈可幾乎楚書曰楚國無以為寶惟善  
以為寶舅犯曰亡人無以為寶仁親以為寶楚國雖  
大亡人雖微然所寶者非外假也亡人以仁親而後  
反楚國以為善而永存當重耳逋亡奔困於憂患險  
阨之際追念父母之所以遇已者深矣唯其克責咎  
悔之意足以消怨尤喟嘆之心仁親愛篤之誠足以  
弭䟽薄讒間之禍則桑落之下固所以為晉室隆昌  
之符也

四明李氏曰晉楚之為國特夷狄之雄耳舅犯之為臣特伯主之佐耳大學參稽格言以垂訓萬世乃於此乎取何歟蓋天下之善無窮君子之取善亦無窮一言當理皆可為法一言契心皆可服行學者誠能多識前言以蓄其德則片辭隻字莫非實用博學詳說莫非切己苟徒徇口耳之習果何益哉

金華邵氏曰自古人君急貨財失人心以至於喪天命者必有小人以功利導之故至於此無小人則人

君決不自為聚斂故引楚書及舅犯之言又引秦誓所言尊賢容衆之君子忌刻淺隘之小人而小人必屏之四方不與同處中國蓋導其君以功利至於失人心喪天命皆此等人也

秦誓曰若有一个臣斷斷兮無他技其心休休焉其如有容焉人之有技若己有之人之彥聖其心好之不啻若自其口出寔能容之以能保我子孫黎民尚亦有利哉人之有技媚疾以惡之人之彥聖而違之俾不通寔

不能容以不能保我子孫黎民亦曰殆哉惟仁人放流之迸諸四夷不與同中國此謂唯仁人為能愛人能惡人

鄭氏曰秦誓尚書篇名也秦穆公伐鄭為晉所敗于殽還誓其羣臣而作此篇斷斷誠一之貌也他技異端之技也有技才藝之技也若已有之不啻若自其口出皆樂人有善之甚也美士為彥黎衆也尚庶幾也媚妬也違猶戾也俾使也拂戾賢人所為使功不

通於君也殆危也彥或作盤放去惡人媚疾之類者  
獨仁人能之如舜放四罪而天下咸服

孔氏曰此明君臣進賢絀惡之事分是語辭古文尚  
書分爲漪休休寬容似有包含也不啻如自其口出  
謂心愛此彥聖之美多於口說言其愛樂之甚也寔  
是也美士爲彥爾雅釋訓文唯仁人之君能放流此  
蔽賢之人使迸遠在四夷也

藍田呂氏曰仁者以天下爲度者也天下之所共好

者仁也吾所以好仁天下之所同惡者不仁也吾所以惡不仁此所以能愛人能惡人也此所以能舉賢退不肖也此所以能好人之好惡人之惡不拂人之性而遠夫菑害者也

山陰陸氏曰唯仁人為能愛人能惡人正言仁人仁者必有勇故也亦仁人然後能放流之孔子曰懷惡而討誰不服

范陽張氏曰修身齊家治國平天下無非以審好惡



為先大學於平天下既歌南山有臺之詩以明好惡之審又歌節南山之詩以明好惡之辟且雜引康誥楚書舅犯秦誓之言以明好善惡惡之理且斷之以唯仁人放流害賢之人又言仁人能愛人能惡人予竊怪正心之說貴於無忿懣恐懼好樂憂患而修身齊家治國平天下之說皆在於審好惡何與正心之說相遼邪及讀唯仁人能愛人惡人之說然後知所以無忿懣恐懼好樂憂患者將以求心之本體本體

既見則私欲消融天理炳見好惡皆公天下而非其私矣

石林葉氏曰技言其能已有技而人有之不媚疾者克己也彥言其才聖言其德已薄於才德而人有之其心好焉者愛人也能克己以愛人則人樂為之用故雖有一介之賤斷斷之弱亦可以為有蓋資諸已不足能資諸人以有為君子亦與之也忌人之能與不容人之才德則所謂蔽賢匿善也仁人惡之故不

# 與同中國

新安朱氏曰聖通明也並猶逐也言有此媚疾之人妨賢而病國則仁人必深惡而痛絕之以其至公無私故能得好惡之正如此也 又曰其引秦誓何也曰言好善之利及其子孫不好善之害流於後世亦由絜矩與否之異也曰媚疾之人誠可惡矣然仁人惡之之深至於如此得無疾之已甚致亂邪曰小人為惡千條萬端其可惡者不但媚疾一事而已仁人

不深惡乎彼而獨深惡乎此者以其有害於善人使  
民不得被其澤而其流禍之長及於後世而未已也  
然非殺人于貨之盜則罪不至死故亦放流之而已  
然又念夫彼此之勢雖殊而苦樂之情則一今此惡  
人放之不遠則其為害雖得不施於此而彼所放之  
地其民復何罪焉故不敢以已之惡施之於人而必  
遠而置之無人之竟以禦魑魅而後已蓋不唯保安  
善人使不蒙其害亦所以禁伏凶人使不得稔其惡

雖因彼之善惡而有好惡之殊然所以仁之之意亦未嘗不行乎其間也此其為禦亂之術至矣而何致亂之有曰屏之為逆何也曰古字之通用也多矣漢石刻辭有引尊五美屏四惡者而以尊為遵以屏為逆則其證也曰仁人之能愛人能惡人何也曰仁人者私欲不萌而天下之公在我是以是非不謬而舉措得宜也

東萊呂氏曰斷斷專慤而無他技則賊之者寡矣故

其心廣大易直休休然其如有容固心之本體也所以迫隘忌克者小知賊之也曰其如有容者莫測其限量而難乎其形容也論君子之樂善終之以不啻如自其口出好之篤也論小人之忌善終之以俾不達惡之遂也小人之於君子不唯疾之惡之違之而已必左右沮遏千慮百圖非使君子不能自達則其心終不厭惡之未遂雖欲自己有所不能思其反則可知君子之於善矣

龍泉葉氏曰此固其國家之所寶而一介臣者亦所恃以自寶也夫善不可以有形德不可以有心山嶽之所藏江河之所受誠有長養潤澤之功也天下之人好為有形之善而各務自為其始本出於善意而其終遂至於媚疾其禍遂至於喪邦者衆矣仁人其好善也篤則其去惡也果蓋非仁人之至善不足以知不仁之為害也

見賢而不能舉舉而不能先命也見不善而不能退退

而不能遠過也。好人之所惡，惡人之所好，是謂拂人之性，菑必逮夫身。是故君子有大道，必忠信以得之，驕泰以失之。

鄭氏曰：命讀為慢，聲之誤也。舉賢而不能使君以先己，是輕慢於舉人也。拂猶俛也。逮及也。大道行所由，孔氏曰：拂謂拂戾人之性。菑必及於身矣。大道謂所由行孝弟仁義之大道也。

河南程氏曰：命當作怠字之誤也。先猶早也。遠謂遘。



諸四夷之類自古用賢人而不能早退小人而不能遠以陷於禍敗者多矣

伊川

山陰陸氏曰孟子曰莫非命也命讀如字見賢而不能舉舉而不能先雖過也自天觀之命也見不善而不能退退而不能遠雖命也自人觀之過也舉賢好先退不肖惡近

石林葉氏曰在下位而見賢有不能舉舉賢而有不能先猶可歸之命若夫居上位而見不善不能退雖

退而不能遠之於已則不可歸之命亦過矣哉一人之情千萬人之情是也好其所惡惡其所好則拂其情矣故曰菑必及其身忠信吉德也驕泰凶德也修其吉以違其凶則君子之道

永嘉薛氏曰進賢之法莫崇禮貌去惡之要莫先克己見賢而不能舉舉而不能先吾命之出者未至耳見不善而不能退退而不能遠是誰之過歟惟能公其心者可與論進賢退不肖之實以百姓之心為心

忠信君子所以仁蓄必逮夫身者驕泰害之者也得失之要在我而已果能忠信則身修而能公其好惡賢不肖之進退在此而不在彼也

新安朱氏曰命鄭氏云當作慢程子云當作怠未詳孰是若此者知所愛惡矣而未能盡愛惡之道蓋君子而未仁者也拂逆也好善而惡惡人之性也至於拂人之性則不仁之甚者也自秦誓至此又皆以申言好惡公私之極以明上文所引南山有臺節南山

之意君子以位言之道謂居其位而修己治人之術  
發已自盡為忠循物無違謂信驕者矜高泰者侈肆  
此因上所引文王康誥之意而言章內三言得失而  
語益加切蓋至此而天理存亡之幾決矣 曰命之  
為慢與其為怠也孰得曰於義則皆通矣然無他書  
而證焉則兩存以俟知者可也曰好善惡惡人之性  
然也而有拂人之性者何哉曰不仁之人阿黨媚疾  
陷溺其心是以其所好惡戾於常性如此與民之父

母能好惡人者正相反使其能勝私而絜矩則不至於是矣 忠信驕泰之所以為得失者何也曰忠信者盡已之心而不違於物絜矩之本也驕泰則恣己徇私以人從欲不能與人同好惡矣

龍泉葉氏曰人之所好惡者天下之心也故其好之也非以為己利其惡之也非以為己怨凡以為人而已君子豈有私意於其間哉夫惟好惡因物而無心曠然率性以合於大道遠禍求福無大於此矣是故

君子有大道必忠信以得之驕泰以失之此最緊要  
是徹頭徹尾事此得失之常理也忠信有必得之理  
而無求得之心不志於得而不廢其道此所以為忠  
信也至於驕泰之失則亡矣非敬無守也非禮無行  
也平居之用力於忠信者所以求免乎此也

金華邵氏曰小人以聚斂失人心蓋本於奢侈無節  
而用度不足至君子之大道則以忠信得之忠信者  
誠實不事華靡之意也經曰忠信禮之本苟驕以自

矜泰而自侈則失之矣

新定邵氏曰前既言為人君者當順民之好惡此遂言臣下之好惡不可以不察蓋臣佐君以平治天下者也臣果好善邪必能進賢輔君以仁其民矣臣不好善而反惡人之善邪則必不能進賢以輔君而上下俱受其害矣仁人又當如此明其好惡以為之用舍也夫善人天地之紀世患無是人耳幸有其人是固君上所賴以贊襄國家所賴以經理生民所賴以

撫綏也古之聖王汲汲以求賢為務古之賢臣汲汲以進賢為忠凡以此爾否則賢者有致君澤民之蘊而抑之使不得伸排之使不得進在賢者一身之榮悴夫何足計而君心無所啓沃國家無所倚賴生民無所庇庥其害可勝言哉不特此爾善人隱伏則儉人競進其好惡任情舉措舛逆後患餘禍且將蔓延而莫知所止又豈但為一時之害而已哉此不祥之實蔽賢者當之自昔聖賢所以深惡於媚疾之人也



然使人主徒知媚疾之可惡而不能斥遠之善亦何  
由伸唯仁人在上放之流之迸逐於四夷不與同居  
於中國所謂投諸四裔以禦魑魅是也此非仁人疾  
惡之已甚媚疾一事妨賢病國為害最深必如是而  
後當其罪爾故曰唯仁人為能愛人能惡人蓋仁人  
之心純乎天理黜陟刑賞如權衡然或輕或重銖兩  
不差此其所以為能愛能惡歟苟為不然見賢而不  
能舉舉之而不能先是雖知其人之可愛而不盡夫

愛人之道也君子得以尤其慢見不善而不能退退之而不能遠是雖知其人之可惡而不盡夫惡人之道也君子得以咎其過然是二者雖未盡夫愛惡之道而猶未全昧夫愛惡之正也若夫好人之所惡惡人之所好則其拂戾於人之性也甚矣蓄害並至必將逮其身如前所謂辟則為天下僂者其斯之謂歟  
雪川倪氏曰前言去惡此言舉賢欲去惡必舉賢可也此章本為去聚斂之臣兼言舉賢者相況取義也

言舉賢不能先此其權在他人尚可以命言若見不善不能退退而不能遠此則在我不能無過不可言命也民之所好好之民之所惡惡之人所公惡而上反好之人所公好而上反惡之是拂逆人之性宜災禍之及身矣

生財有大道生之者衆食之者寡為之者疾用之者舒則財恒足矣仁者以財發身不仁者以身發財未有上好仁而下不好義者也未有好義其事不終者也未有

府庫財非其財者也

鄭氏曰財恒足者不務祿不肖而勉民以農也發起也言仁人有財則務於施與以起身成其令名不仁之人有身貪於聚斂以起財務成富未有好仁而下不好義言君行仁道則其臣必義以義舉事無不成者其為誠然如已府庫之財為已有也

孔氏曰此經明人君當先行仁義愛省國用以豐足財物生之者衆謂農桑多食之者寡謂減省無用之

費為之者疾謂百姓急營農桑事業用之者舒謂君  
緩於費用

橫渠張氏曰知用財而不知養財天下所以窮知養  
財而不知用財天下所以不治仁者能散以顯己之  
仁不仁者能聚以顯己之富仁者無富於己則克儉  
於骨肉則恩及之利心多而義心少是不仁也

藍田呂氏曰國無游民則生之者衆矣朝無幸位則  
食之者寡矣不違農時則為之者疾矣量入為出則

用之者舒矣此生財之道也以財發身唯富足然後  
可以推吾濟人之惠也以身發財則非驕奢無以矜  
己之富也此仁不仁之分也故唯仁者能與天下同  
其利上有不私之仁下有樂輸之義心誠樂之如孝  
子之養父母未有子富而父貧百姓足而君不足者  
也

延平周氏曰有生財者衆然後求其食財者寡有為  
財者疾然後求其用財者舒此先王理財之成法也

若不求生財為財之道而徒欲食之寡用之舒者特  
墨子之私愛者耳以財發身者為身而不為財者也  
以身發財者為財而不為身者也上不好仁則下不  
好義下不好義則其事不能有終其事不能有終雖  
有府庫而財非其財此鹿臺之財所以不用於商而  
用於周者也

嚴陵方氏曰仁者以財發身不仁者以身發財則身  
為財所害利害之際在乎仁不仁之間而已上以仁

而接下下以義而事上君臣上下報施之道如此而已然孟子曰君仁莫不仁君義莫不義者蓋孟子言教化之驗此言報施之宜教化之道上下無異報施之道上下不同義所以制事臣所以代終故曰未有好義而其事不終者也好義而賤利則無爭民施奪之患故繼之以未有府庫財非其財者也

山陰陸氏曰未有府庫財非其財者言民之所藏其府庫也荀息曰寶出之內府藏之外府馬出之內



廢繫之外廢

石林葉氏曰生之者衆為之者疾用天時也食之者寡用之者舒節人欲也得其時而不敢縱欲生財之道也為仁者不富故凡聚財者欲其發身之仁也為富者不仁故凡發身者欲其聚財之富也上能好仁則下不敢後其君故能義下能好義則可以有為故終其事上下以仁義相與而事成矣凡府庫所積者無不義之財此德所以為本財所以為末也

永嘉薛氏曰易稱何以聚人曰財財者國用所出其  
可緩乎雖然為國務民之義而已財者利之所在人  
之所必爭也人必爭而我奪之則利心生而禮義消  
矣務民之義則天下一家而財不可勝用藏之於下  
猶在君也以財發身用之者也不知所以用之身為  
財之役矣故君子先正其本為上有節為下敦本財  
用之出庸有窮乎是故務民之義在乎修身以仁民  
民化於仁則愛之如父母畏之如雷霆上下情通財

皆可得而用率斯道也其有不終於事者乎一家仁而一國興仁非他道也務民之義不以利為先爾東萊呂氏曰君子創業垂統為可繼也若夫成功則天也然則有好義而其事不終者矣而大學以為未有好義其事不終者何也曰好義則其志伸矣其志伸則其事終矣

新安朱氏曰愚案此因有土有財而言以明足國之道在乎務本而節用非必外本內末而後財可聚也

自此以至終篇皆一意也發猶起也仁者散財以得  
民不仁者亡身以殖貨上好仁以愛其下則下好義  
以忠其上所以事必有終而府庫之財無悖出之患  
也曰上文深陳財用之失民矣此復言生財之道  
何也曰此所謂有土而有財者也夫洪範八政食貨  
為先子貢問政而夫子告之亦以足食為首蓋生民  
之道所不可一日無者聖人豈輕之哉特以為國者  
以利為利則必至於剝民自奉而有悖出之禍故深

言其害以為戒耳至於崇本節用有國之常政所以厚下而足民則固未嘗廢也呂氏之說得其旨矣有子曰百姓足君孰與不足孟子曰無政事則財用不足正此意也然孟子所謂政事則所以告齊梁之君使之制民之產者是矣豈若後世厲民自養之云哉曰仁者以財發身不仁者以身發財何也曰仁者不私其有故財散民聚而身尊不仁者唯利是圖故捐身賈禍以崇貨也然亦即貨而以其效言之爾非謂

仁者真有以財發身之意也曰未有府庫財非其財者何也曰上好仁則下好義矣下好義則事有終矣事有終則為君者安富尊榮而府庫之財可長保矣此以財發身之效也上不好仁則下不好義下不好義則其事不終將為天下僂之不暇而況府庫之財又豈得為吾之財乎若商紂自焚而鉅橋鹿臺散德宗出走而瓊林大盈掠皆以身發財之效

范陽張氏曰大學平天下之道也其末皆論財利之

說何也蓋有德此有人有人此有土有土此有財有財此有用不講所以用財之說非失於侈汰必墮於聚斂故大學細極其理而以謂平天下者更當知所以用財之道也漢武帝罷黜百家表章六經似矣不知用財之道筭及舟車權及鹽鐵以資淫侈之費唐明皇平定內難委任賢相似矣不知用財之道括田搔擾六使掊克亦以資淫侈之費唐德宗初即位放棄豸出宮人似矣不知用財之道大盈瓊林間架除

陌之貪其聚斂無所不到是皆不知用財之說至是也故君子生財之道一以儉約為先儉約者義也生之雖衆食之乃寡非儉乎為之雖疾用之乃舒舒簡也非約乎儉約為心則無所往而不足矣蓋仁者以義為主故財散之於民而其身之義亦因財以發見於天下不仁者以利為主故財斂之於已而好利之心亦因財以發見於天下君人者將因財以揚已之義德乎抑將因財以揚已之利心乎宜知所自處也



上好仁則下好義天下可長保矣豈有不善終之理乎所好者義則人君府庫之財皆什一之法所取於民者耳未嘗有一毫橫斂之物置於其間也是則府庫之財無非其所當有之財也說者謂民府庫之財無非人君之財此豈可以為訓得不啓後世暴君汚吏貪欲之心借此以為口實乎故余以為財非其財者皆所當得之財也何謂不當得之財下文孟獻子之論是矣

龍泉葉氏曰一人之所生過於一人之所食先王之法使天下之人皆足以生財則其職分之所當為者汲汲為之唯恐不及而不暇於用也夫是以天下無可理之財無可聚之利菽粟如水火而仁義存焉此其所以儉而能勤既富而教也後世人倫不明始有食而不生用而不為非特衆寡疾徐之間也然後其上焦然日以生財為務而以聚斂為當然蓋舜禹周公之法其謂之難行也久矣未易以一二言也仁者

以身發財不仁者以財發身此一道也存乎其人之  
仁不仁而已鉅橋之粟鹿臺之財前日之所積今日  
之所散豈有異術哉雖然於陵仲子之操非天下之  
所能安也舜與跖之分王與霸之異全在義利之間  
唯其好義也則聚天下之人聚天下之人則致天下  
之財均其有無約其貧富成順致利以安天下所謂  
室家之道君臣父子之節養生送死之禮皆由此而  
成故曰未有好義而其事不終者也天下之事至於

終極而不倦本末相應先後相為其極至於無一夫之不獲者此好義之心所發也若夫利則止於是而已豈復能終其事哉

雪川倪氏曰君子有大道可也生財亦曰大道者以見道之無所不通也以生財言之不以利為利以義為利是生財之大道也若以利為利就使有得不過小道耳仁者以財發身蓋博施而名彰也為仁不富雖不富然足以發其身而為人所尊敬且得民矣不

仁者知有身而不知有仁知有利而不知有義徒欲  
以身興發其財耳是以爲富者必不仁季氏雖富於  
周公而反以自損身固不能發好利而多怨多藏必  
厚亡其於財也亦何發之云

錢塘于氏曰大學既明忠信以爲生財之本又指仁  
義以立用財之訓仁者以財發身既天下之財常足  
於天下而吾身不與焉惟上好乎仁則下歸乎義下  
歸乎義則終其奉上之事府庫無非義之財也

新定邵氏曰生者衆多而食者寡少則必有餘蓄矣  
為者敏疾而用者舒緩則必有積儲矣此財所以恒  
足歟善乎賈生之言曰夫百人作之不能衣一人欲  
天下亡寒不可得也一人耕之十夫聚而食之欲天  
下亡飢不可得也此言正與大學相發明發猶起  
也仁者以愛人利物為事損上以益下財幾於散矣  
卒之人懷其惠仰若父母何榮如之是財雖散而身  
日起也故曰以財發身不仁者以剝民利已為事苛

征而虐取財非不聚也卒之民不堪命疾視若讎禍孰甚焉是財日起而身益危也故曰以身發財嗟夫仁者唯知與民共財而已初無心於藉是以發其身也而愛人者人常愛之乃天下必至之理故惠鮮鰥寡庶民子來未有好仁以愛其民而下不好義以事其上者也庶民政之不日成之未有好義以事其上而所為之事有不終者也斯民樂事勸功則爭出粟米絲麻作器皿通貨財以事其上又安有府庫

財非其財者哉是仁者雖不以財自私而富有四海之內天下之財皆一人之財也彼不仁者之用心何其謬哉方其切切於斂財本以私其身也而卒因是以亡其身則雖有財安得而用之唐太宗語侍臣曰吾聞西域賈胡得美珠剖身以藏之人皆知笑彼之愛珠而不愛其身也帝王徇奢欲以亡國者何以異於彼胡之可笑邪斯言可以暗合以身發財之戒矣孟獻子曰畜馬乘不察於雞豚伐冰之家不畜牛羊百



乘之家不畜聚斂之臣與其有聚斂之臣寧有盜臣此  
謂國不以利為利以義為利也

鄭氏曰孟獻子魯大夫仲孫蔑也畜馬乘謂以士初  
試為大夫也伐冰之家卿大夫以上喪祭用冰百乘  
之家有采地者也雞豚牛羊民之所畜養以為財利  
者也國家利義不利財盜臣損財耳聚斂之臣乃損  
義論語曰季氏富於周公而求也為之聚斂非吾徒  
也小子鳴鼓而攻之可也

孔氏曰此一經明治國家不可務積財案書傳士飭車駢馬詩云四牡駢駢大夫以上乃得乘四馬今下云伐冰之家是卿大夫今別云畜馬乘者不察雞豚故知士初試為大夫也案昭四年左傳云大夫命婦喪沐用冰喪大記云士不用冰故知卿大夫也士若恩賜亦得用之但非其常故士喪賜冰賜夷槃可也百乘之家謂卿也故論語云百乘之家鄭云采地一同之廣輪是也

山陰陸氏曰畜馬乘士也言乘不言車士乘棧車車不足言也言察不言畜雖畜之而不察百乘百邑春秋傳曰唯卿備百邑

石林葉氏曰勞心者治人治人者食於人故以義為主勞力者治於人治於人者食人故以利為主百乘之家非備貴者也然其職在於治人故不畜聚斂之臣畜聚斂之臣寧有盜臣蓋盜臣止於竊命而聚斂之臣則以掊克於民而民困雖有粟安得而食諸有國

者不以利為利以義為利也然則正德利用厚生惟和先王猶用以為治必曰義者何也蓋以利為利則民所知者利而已故不奪不餼以義為利則民知義矣利自存乎其間故三代盛時民以義事上則曰雨我公田遂及我私上以義恤民則曰駿發爾私終三十里上下相待如此豈爭奪而厭者乎

藍田呂氏曰雞豚牛羊庶民之所畜也卿士大夫既食於人又與之爭食則專利矣專利則以利為利盜

者失財於一旦矣聚斂者誅求而無厭此所以寧有盜臣也

新安朱氏曰君子寧亡已之財而不忍傷民之力故寧有盜臣而不畜聚斂之臣此謂以下釋獻子之言也 曰其引孟獻子之言何也曰雞豚牛羊民之所畜養以為利者也既已食君之祿而享民之奉矣則不當復與之爭此公儀子所以拔園葵去織婦而董子因有與之齒者去其角傅之翼者兩其足之喻皆

絜矩之義也聚斂之臣剝民之膏血以奉上而民被其殃盜臣竊君之府庫以自私而禍不及下仁者之心至誠惻怛寧亡已之財而不忍傷民之力所以與其有聚斂之臣寧有盜臣亦絜矩之義也昔孔子以臧文仲之妾織蒲而直斥其不仁以冉求聚斂於季氏而欲鳴鼓以聲其罪以聖人之宏大兼容溫良博愛而所以責二子者疾痛深切不少假借如此其意亦可見矣曰國不以利為利以義為利何也曰以利

為利則上下交征不奪不厭以義為利則不遺其親  
不後其君蓋唯義之安而自無所不利矣程子曰聖  
人以義為利義之所安即利之所在正謂此也孟子  
分別義利拔本塞源之意其傳蓋亦出於此

范陽張氏曰士初為大夫而畜馬乘者不當有雞豚  
之財卿大夫喪事而得伐冰者則不當有牛羊之財  
卿大夫有采地而得百乘者則不當有聚斂之財有  
聚斂之臣以取不當得之財不若有盜臣而耗府庫

之資也耗府庫止失財耳民心不動也有不當得之財則失民心矣財安用乎

新定邵氏曰孟獻子魯大夫仲孫蔑也在春秋時以賢稱方獻子之未有是言也孰不曰盜臣竊吾之貨賄是不可有也聚斂之臣能為吾生財是不可無也自獻子之言一出然後知盜臣竊吾之什百是什百而已也竊吾之千萬是千萬而已也若聚斂之臣為吾國利以召怨怨積而不可解則其禍有不可勝言



者是盜竊之害猶小而聚斂之害甚大也二者俱不可有權輕重而論則與其有聚斂之臣寧有盜臣耳異時尹鐸保障繭絲之論蓋有見於斯也

龍泉葉氏曰孟獻子衰世之大夫也未足以知大義之所在焉然其所存則固若此矣天下之惡無過於盜而謂聚斂為甚者非惡之而然也計其利害之所終然後知其甚於盜也

嚴陵方氏曰或不察於雞豚或不畜於牛羊或不畜

聚斂之臣者皆言受祿於公者不宜爭利於私也

長國家而務財用者必自小人矣彼為善之小人之使  
為國家蓄害並至雖有善者亦無如之何矣此謂國不  
以利為利以義為利也

鄭氏曰務聚財利為己用者必忘義是小人所為也  
彼君也將欲以仁義善其政而使小人治其國家之  
事患難猥至雖云有善不能救之以其惡之已著也  
嚴陵方氏曰君子喻於義小人喻於利故務財用者

必自小人小人所以得用者君以為善政也菑害者  
天菑之人害之也

石林葉氏曰聚人者財理財者義務財用求所以聚  
人也不務財用求所以為義也小人不知所以聚人  
而務在於聚財此菑害所以並至也蓋冉求嘗問於  
孔子曰既庶矣又何加焉曰富之及為季氏聚斂則  
曰鳴鼓而攻之可也夫始告之以富者欲以聚人終  
責之以聚斂者為其不義聖人之意蓋可知也

新安朱氏曰彼為善之此句上下疑有關文誤字自由也言由小人導之也此一節深明以利為利之害而重言以結之其丁寧反覆之意切矣曰此其言留害並至無如之何何也曰怨已結於民心則非一朝一夕之可解矣聖賢深探其實而極言之欲人以審於未然而不為無及於事之悔也以此為防人猶有用桑弘羊孔僅宇文融楊慎矜陳京裴延齡之徒以敗其國者故陸宣公之言曰民者邦之本財者

民之心其心傷則其本傷其本傷則枝幹凋瘁而根本蹙拔矣呂正獻公之言曰小人聚斂以佐人主之欲人主不悟以為有利於國而不知其終為害也賞其納忠而不知其大不忠也嘉其任怨而不知其怨歸於上也嗚呼若二公之言則可謂深得此章之指者矣有國家者可不監哉

龍泉葉氏曰長國家而務財用此小人之所從入也非其國之好利則小人無自而進小人進則利門啓

而百患起善為國者明善敦化以示好惡使小人無  
間可入濡沫摩撫左右媚悅陰導利源使天下不知  
其取之有方其致之有故有以自結於人衆皆悅之  
而非先王之大道此所謂為善之小人也天下之人  
知其攘臂而為不義也則其君亦何遽用之唯其自  
名為善而不察也及其為之上不當於天心下不合  
於民志其召禍之由陷民而亡其國者是小人之為  
也

東萊呂氏曰君不鄉道不志於仁而求富之是富桀也故長國家而務財用無與人同利之心是必小人矣人之所非彼之所善故曰今之所謂良臣古之所謂民賊也既曰善矣則唯其言之聽求善人之立而國之無菑害難矣是皆不知以義為利與人同之而已又曰大學所記自致知格物以至家齊國治而天下平先後本末循循有序學者明乎此而力行之則聖功也而篇末乃反覆教戒為利之害如此則知

為天下國家而賊夫心術者利為甚何也以其私已而外人也私已而外人其身且不能保其能體人物與已為一乎故記者極言之戰國之世聖人之道不行君臣父子之間所以相告語者唯有利害不知禮義當是時傳聖人之學者幾不立矣凡此之論皆以為迂闊而遠事情賢者畏之故極言之以為是則大學之終也

范陽張氏曰漢武財用桑弘羊孔僅咸陽啓之明皇



財用宇文融王鉞楊慎矜楊國忠啓之德宗財用盧  
杞皇甫鏐啓之彼數君者以桑弘羊宇文融盧杞等  
為善使為國家然而漢武晚年盜賊四起明皇晚年  
有祿山之難德宗晚年有奉天之難菑害並起雖平  
時所謂善者如桑弘羊楊國忠盧杞輩亦無如之何  
然則國當以利為利乎以義為義乎

藍田呂氏曰君不鄉道不志於仁而求富之是富桀  
也故長國家而務財用無與人同利之心是必小人

者也小人者人之所非彼之所善故曰今之所謂良臣古之所謂民賊也既曰善矣則惟其言之聽持不仁之質以當國用事求善人之立而國之無菑害難矣是皆不知以義為利與人同之而已

建安真氏曰義者天理之公也利者人欲之私也二者如冰炭之相反然一於義則利自在其中蓋義者宜也利亦宜也苟以義為心則事無不宜也不惟宜於已亦且宜於人人已兩得其宜何利如之若以徇

利為心則利於己必害於人爭鬭攘奪於是乎興已  
亦豈能享其利哉 又曰大學所謂利專指財利而  
言伊川先生云利不獨財利之利凡有一毫自便之  
心即是利此論尤有補於心術之微至南軒先生又  
謂無為而為皆義也有所為而為即利也其言愈精  
且微學者不可不知也然必先以不貪財利為根脚  
基址方可說上兩節正如貧而無諂富而無驕方能  
漸至樂與好禮之地馴序用力自粗至精方可至純

乎天理之地

四明李氏曰君子喻義小人喻利一義一利截截乎冰炭之異涇渭之別也商湯惟知以義制事而貨利則不殖周武崇信明義而四海則大賚今乃以義為利則是君子之喻義乃所以為喻利邪曰是不然大學此語為後世言之耳蓋自功利之說興聚斂之門起下焉者誇淺陋之規而排迂闊之見上焉者陽諱其名而陰蹈其實故大學君子直指利害之實而立

為以義為利之論發明古人為義之餘效而非以推  
原古人為義之本心吁古人心事坦然明白惟知有  
是非不知有利害非曰人徒以利為利我獨以義為  
利揣量輕重巧擇其一假義利之名以濟功利之習  
也讀大學之書者以意逆志是為得之

新定邵氏曰世之人君苟非殘忍甚不仁者初豈有  
心於培克其民哉彼小人者志於竊君之寵祿而無  
以為進身之謀始唱為興利之說以動其君之聽曰

不如是無以充府庫而致富強也世主誘於其說始  
信之任之而不可回矣故凡欲藉是以長盛其國家  
而切切焉以財用為務者必自小人始也彼為善之  
一語殊不可解朱文公云上下疑有闕文誤字是已  
讀者略其辭而會其意可也記大學者若曰世主聽  
小人之言其心必善之謂真可以長國家也不知使  
斯人而為國家乃怨讟之媒禍患之府也及菑害並  
至雖有善於營救者亦無所措手其將柰之何哉所

以甚言夫小人之不可聽人主當速遠之毋使他日  
有噬臍之悔也厥後孟子得之極口為當時言者有  
能為君闢土地充府庫者今之所謂良臣古之所謂  
民賊正與此章之指相為發明由是論之為國者其  
將以利為利乎抑以義為利乎大學於篇終一再言  
之後之治國平天下者可以觀矣

禮記集說卷一百五十三



謹案第四頁前一行謂爭鬪之民刊本鬪訛奪今  
改

第十頁前六行唯其克責咎悔之意刊本悔訛悔  
今改

第二十二頁後八行生之者衆謂農桑多刊本謂  
訛為今改

第二十四頁後八行出之內府刊本府訛藏今改  
第二十六頁前一行其有不終於事者乎刊本事

訛義今改

第二十七頁後五行將為天下僂之不暇刊本為  
訛謂又脫下字今增改


第二十八頁前八行放象豸刊本豸訛融今改

第二十九頁後八行其謂之難行也久矣刊本行  
訛明今改

第三十九頁後六行惟其自名為善而不察也刊  
本為訛於今改

第四十一頁前七行藍田呂氏曰說與前頁東萊  
呂氏說大概相同疑係刊本引來重複





覆校官編修臣項家達

校對官檢討臣盧應

謄錄監生臣康偉